

百司凡有公務稟可居先四方爭事輸珍封進在後驕矜益恣
貪虐罔悛馴致有漸固非一朝而一夕醞釀既久何恠作福而
作威遂使大權潛移朝廷顛倒忠良扼腕而無措正直鉗口而
莫論國家之勢殆哉 宗社之危迫矣幸賴天彝罔墜大義猶
存 宗社之靈不可欺神明之鑑必共照公論之發夫豈偶然
予心勿疑蓋有由耳三危之竄雖予一人好生之仁兩觀之誅
實爾羣情罔貸之意第以安老曾在三公之列沆等亦為二品
之官姑且從輕咸令賜死如許洽金謹思者或以黨比其惡或
以助成其奸豺虎之投亦所不惜魑魅之禦其復何辭至於朴
洪麟蔡洛李彭壽鄭希廉皆以瑣瑣鄙夫庸庸倭士既附勢而
躋顯位人所共嗤故削官而黜都城罪當甘受餘悉罔治使得
自安於戲四凶竄殛於虞朝三姦破碎於唐室何人不服至公
攸行況今剪磔今將驅除不道 宗社多帖永為萬世之垂休
朝廷清明嘉興一國而同慶故茲教示想宜知悉○己卯夜異
方坤方有氣如火○以許垌招辭傳于政院曰今以啓覆事三公